



EDITORIAL

Hul-os nga kaisog nga atuhan an pasista nga pangatake ni Duterte!

Ha pag-abre han ikaduha nga tunga han 2020, susrunod nga ginpatay ngan ginsikmit han mga elemento han 8th Infantry Division an mga aktibista ngan parag-uma ha Eastern Visayas. Duha nga lider-masa an waray-kaluoy nira nga ginpatay ngan diri mamenos ha tulo nga parag-uma an ira gindakop. Damo hini gintahapan hadto han rehimen Duterte nga mga kaapi o tagsuporta han Bagong Hukbong Bayan (BHB).

Pagpatuman han Oplan Kapanatagan han rehimen Duterte ini nga kama-darahug. Katuyuanan hini nga tapuson an "insurhensiya" pinaagi han pagtarget ha mga kunohay nasuporta ha BHB. Ginpatay, gintatanoman han ebidensya, pwersahay nga ginpapasurender ngan ginsasalawdan han hinimu-himo nga kaso an mga sibilyan, aktibista, demokratiko nga organisasyon, makatawo nga institusyon ngan mga upisyal han reaksyunaryo nga guberno nga ha magkalain-lain nga pamaagi ginpapasu-

long an interes han katawhan para ha tuna, suhol, pankatilingban nga serbisyo ngan pagrespeto ha tawhanon nga katungod. Kadungan hini, ginpaspas an Anti-Terrorism Bill nga ngangaranan komo "terorista" an hin-o man nga natipa kan Duterte, ngan maghahatag han dugang nga ligalidad an ira pasista nga panmuypoy. Magigin hul-os na an iya diktadura.

Pagpakalas, pananarhug ngan pagpahuyo ha masa an ira katuyuanan. Gerra han panmuypoy an ira gin-uuna samtang gin-aantos han katawhan an grabe nga krisis tungod ha pakyas ngan madarahuhg nga pagresponde han guberno ha pandemya. Desperado na an terorista nga rehimen Duterte ngan an 8th ID. Naghihimatay na ini nga lanaton an dedlayn nga pulbuson an rebolusyunaryo nga kagiusan ha rehiyon ha 2021.

Ha masunod nga mga bulan, angay lauman an mas grabe nga pangatake ha

2 nga lider-masa, ginpatay ha Eastern Visayas

DUHA NGA LIDER-MASA an brutal ngan susrunod nga ginpatay han mga pwersa han estado ha Eastern Visayas ha katapusan nga semana han Mayo. Luyo ini han waray kaparehas nga pagkukuri han katawhan tungod ha pandemya nga COVID-19 ngan mga balaud militar nga kundisyon nga gin-imponer han rehimen.

Madarahug nga ginpatay han mga pwersa han estado an lider-masa nga hi Carlito "Ka Karlets" Badion, pankabug-usan nga sekretaryo han Kadamay, ngan Allan "Mano Boy" Aguinaldo, lider han Northern Samar Small Farmers' Association (NSSFA).

Ginpatay hi Badion hadton Mayo 25, ha Ormoc City, Leyte. Sigon ha mga nakakita han iya patay nga lawas, namatay hiya ha balbag han kahoy ha ulo. Nakit-an na la hi Badion nga nakalubong hin waray bado haros 100 metros an kahirayuan ha gin-uukyan niya nga payag ha uma duha kaadlaw kahuman hiya una nga ginsumat nga nawawara hadton Mayo 26.

Nakit-an liwat nga nawawara an mga gadyet ngan bado ni Badion sugad liwat an duha kasako han mais, upat nga manok ngan mga higamit ha uma nga nakatago hini nga payag. Tulo tubtub lima katawo an gintutuohan nga nagburublig agud patayon ngan kawaton an iya nga propyedad.

Ginpagawas han kapulisan ko-
"Lider-masa...", "sundan ha paypay 2

"Lider-masa...", *tikang ha paypay 1*

mo simple nga pagkawit ngan pagpatay (*homicide*) an nasering nga kaso agud tahuban an targeted nga papatay ha kilalado nga lider-masa. Hadto pa nakarawat hi Badion han mga tarhug ha iya kinabuhi tikang ha rehimen Duterte komo tagapagbandilyo han isyu han kablas-ha-syudad ilarum han Kadamay. Tungod ha grabe nga sarbeylans ngan pan-gigipit, napiritan hiya nga bumalik ha iya gintikangan nga prubinsya han Leyte. Piang ha usa nga tiil hi Badion tungod ha sakit nga polio.

Ginbalewaray la ngan hamabaw an pag-imbetiga han nagresponde nga pulis nga hi POSgt. Camete han Ormoc City Police ha madarahug nga krimen. Ginpakiana la han pulis an pira nga detalye hiunong ha gintikangan han bikti-

ma, ginkuhaan han ritrato an iya ID, ngan gumikan dayon. Waray man la hini kuhaon an ebidensya nga nakasarang hirani ha ginlubungan kan Badion sugad han pitaka, *boxer*, ngan *solar panel* hini.

Ginpatay naman han mga elemento han 43rd IB an lider-parag-uma nga hi Aguinaldo ha iya balay ha Barangay New Rizal, Catarman hadton Mayo 27. Gintahuban ini han militar komo engkwentro kontra ha BHB samtang maiha na nga mapaso ha ira an biktima ngan an NSSFA tungod ha militante nga tindog

hini ha kamutangan han mga parag-uma ha prubinsya.

Aktibo nga kaapi han NSSFA hi Aguinaldo. Usa hiya ha mga nanguna ha Lakbayan han Eastern Visayas ngadto ha Manila hadton 2016 ngan 2018 agud ibuksas an destroso nga gindurot han kalamidad kalakip an peste, bagyo ngan militarisasyon.

"Lider-masa...", *sundan ha paypay 3*



"Hul-os...", *tikang ha paypay 1*

masa. Atubangan han waray kaparehas nga brutalidad ngan pagpakuri, ano pa ba nga dalan an angay hasgon kun diri an dalan han rebolusyon? Ano pa ba an angay himuon kundi pakusgon an determinasyon ngan magkaurusa nga atuhan an ginpapintas nga pangatake han kaaway?

Kinahanglan hul-os nga kaisog nga maglansar han gerra han katawhan kontra ha rehimen Duterte ngan 8th ID. Ibuksas an ira kamadarahug ngan ipanawagan an pinakahiluag nga pagkunderar agud hul-os nga mahimulag ngan patalsikon an dikta-dor, kurakot ngan pakuri nga hi Duterte. Pakyason an pag-atentar han kaaway ha magpaso nga masa pinaagi han pagbutang ha ira ha naangay nga dispusisyon. Poyde hira ipaaklop ha mga yunit han BHB.

Ha kabaryuhan, tukuron ngan pakusgon an mga sanga han Partido, organisasyon han parag-uma, ngan yunit han BHB komo prinsipal nga makinarya para ha gerra han katawhan. Urusahon an katawhan pinaagi han pagbaton ha ira mga araba, lakip an todo-gerra han rehimen, kalamidad, Covid-19, ngan pyudal ngan bagapyudal nga paniniyupi. ■

Waray wantas nga pangungutang ni Duterte, pagagrabihon an kakurian han katawhan

GINSISINGABOT HAN "ADIK ha utang" nga rehimen Duterte an pandemya nga Covid-19 agud dugang nga umutang ha mga langyaw nga nasud ha tahub han "pagpapaandar han ekonomiya" ngan paghatag han pinansyal nga ayuda. Ini an pahayag han Partido Komunista ng Pilipinas (PKP) kahuman makatirok an rehimen hin maabot \$5.5 bilyon (o P275 bilyon) nga utang tikang ha langyaw nga mga nasud sakob la hin tulo kabulan.

Lakip hini nga mga utang an ginpondohan han Asian Infrastructure Investment Bank (gindodominaran han China) Asian Development Bank (gindodominaran han Japan), ngan World Bank (gindodominaran han US.) Ginpalobo hini nga mga utang an kabug-usan nga utang han Pilipinas tikang P8.177 trilyon ngadto ha P8.452 trilyon, gawas pa an interes. Karuyag sidngon, kada Pilipino mayda utang nga P77,212 nga babaydon niya pinaagi han buhis.

Sigon ha PKP, mahihingadto la ini nga kwarta ha mga maanomaliya nga

pan-imprastruktura nga proyekto, pambayad ha mga upisyal militar, ha gerra kontra druga, ha *confidential funds* (sikreto nga pondo) ni Duterte, ngan iba pa nga anomaliya. Trilyon-trilyon piso liwat an gagastuson para ha mga helikopter ngan iba pa nga higamit pan-gerra, para ha kontrainsurhensiya, ngan kurapsyon ha pagresponde ha Covid-19.

Makasisina gud, sering han PKP, nga ginlulubong han rehimen an katawhan ha langyawanon nga utang samtang padayon nga gin-iibanan an buhis para ha dagko nga korporasyon.

"Waray wantas...", *sundan ha paypay 3*



FMO ha Leyte

SUKWAHI HA GINSERING han berdugo nga kumander nga hi Brig. Gen. Lope Dagoy nga akos na nira nga "makontrol an insurhensiya" ha Leyte, naglansar han *focused military operations* (FMO) an 802nd Infantry Brigade kontra ha Bagong Hukbong Bayan (BHB) ha isla tikang Marso tubtub Abril. Sigon ha BHB-Leyte Island (Mt. Amandewin Command o MAC), dirudiretso nga naghimo an 93rd IB ngan 78th IB (antes ini mabalhin ngadto ha Eastern Samar) han mga operasyon kombat, sarbeylans ngan pagpusisyon ha baryo, ngan mga buladas han mga buwa nga engkwentro ngan pagsurender agud padayon hira nga kumita ha pagigin mersenaryo nga pwersa panseguridad ngan magkawat ha E-CLIP.

Magkalain-lain nga pamaagi an ginhihimo han 802nd IBde agud igpabilin an postura hini nga waray na BHB ha Leyte. Landaw an estilo nga "shotgun method" o pamaagi nga dumog pinaagi han dako nga pwersa ngan tinagdako nga operasyon militar agud lanaton an yunit han BHB ha mga lugar nga mayda presensya nira.

Ha sur han Leyte, naglansar han operasyon kombat an kusog-kumpanya nga tropa han 78th IB ha diri mamenos ha 11 nga baryo ha mga bungto han Mahaplag ngan Abuyog ha Leyte, ngan Sogod ngan Bontoc ha Southern Leyte. Sustenido liwat nga ginpusisyon han mga sundalo an mga baryo kun diin hira naghimo han operasyon nga Retooled Community Support Program (RCSP), kalakip an Pandan, Maligaya, ngan Sta. Cruz ha Mahaplag, Pinamanagan ha Abuyog, Kahupian ngan Pancho Villa ha Sogod, ngan Ulisihan ha Bontoc. Gintatarhug, ginpapatawag ha kampo han militar ngan piniritay nira nga ginpapasurender an

mga natudlok nira nga lider-parag-uma ngan mga gindududahan nga nasuporta ha BHB. Ginbabantayan liwat an gios han mga residente bisan an pagkadto nira ha umhanan samtang pira kagab-i nga nakita han masa an pagpalupad han *drone*.

Labot ha mga baryo, ginpusisyon liwat han mga sundalo an kalsadahan. Kalakip hini an haywey ha Hilongos ngan Mahaplag kun diin nageseserbe hira nga "pwersa panseguridad," ngan ha Sogod kun diin upod nira an mga pulis ha tsekpoynt nga para kuno ha ira kampanya kontra Covid-19. Panarhug pa nira, poyde nira patayon dayon an hin-o man nga maagi nga mayda Covid-19.

Samtang, ha ikatulo nga distrito han Leyte, masobra 100 nga tropa han 93rd IB an naglansar han ma-

sobra usa kasemana nga operasyon ha haros siyam nga baryo kalakip an Monterico, San Vicente, ngan Manlilinao ha Ormoc, ngan Bulak ha Matag-ob. Nagpalupad pa hin helikopter an militar agud magpahaw-as han mga sundalo. Ha iba nga parte han Ormoc, magkatig-ob nga pwersa han AFP ngan PNP an naghimo han operasyon kombat ha mga baryo han Biliboy, Donghol, Mahayag, Boroc ngan Hugpat tikang katapusan nga semana han Pebrero tubtub syahan nga semana han Marso. Nagtindog liwat han tsekpoynt an militar ha mga tubtuban han Ormoc ngan Kananga. Ha sakob han Kananga, ginpusisyon an baryo han Rizal ngan nagtindog han tsekpoynt ha mismo nga bungto.

"FMO...", *sundan ha paypay 4*



"Lider masa...", *tikang ha paypay 2*

Kasumpay pa gihapon an pagpatay kanda Badien ngan Aguinaldo ha pag-aresto ha Tacloban 5 hadton Pebrero. Pangilal-an ini han nagpapadayon nga kampanya han 8th ID nga rumkon an mga ligal nga organisasyon masa ha Eastern Visayas.

Pandakop. Ha Northern Samar, gindakop han mga sundalo hi Cris Baluyot, presidente han Asosasyon han mga Parag-uma Kontra Kagutuman ngan Kakablasan o APKLAS,

upod an parag-uma nga hi Alvin Lucapa ngan usa nga menor de edad ha Barangay Epaw, Las Navas hadton Hunyo 1. Una na nga gintarhog han mga elemento han 20th IB hi Baluyot nga sumurender ha ira hedkwarters ha Brgy. San Jorge han pareho nga bungto. Kun diri, an mga sundalo mismo an makadto ha iya balay. Hadton 2019, mismo an kumander han 20th IB nga hi Lt. Juan Gullem an nag-akusar ha APKLAS ngan NSSFA komo mga "komunista nga prente." ■

"Waray wantas...", *tikang ha paypay 3*

Nakasalang ha kongreso an Corporate Recovery and Tax Incentives for Enterprises (Create) Bill, nga magpapaluros han *corporate income tax* (buhis ha kita han mga kompaniya) tikang 30% ngadto ha 25%. Samtang, hadton Mayo, ginmando ni Duterte an dugang nga 10% nga buhis ha imported nga krudo ngan produkto nga petrolyo, nga nagresulta ha pagsirit han presyo han lana, pagkaon ngan batakan nga mga epektos.

Nanawagan an PKP ha katawhan nga kolektibo nga atuhan ini nga mga neoliberal nga palisiya nga ginhihimo ha tahub han pagbaton ha Covid-19. ■

Pagsaludar

Pula nga pagsaludar kan Ka Jaime Soledad!

GINHAHATAG HAN PARTIDO Komunista ng Pilipinas ha Eastern Visayas an pinakahitaas nga pagsaludar kan Kasamang Jaime Soledad, kadre han Partido ngan Pula nga mangaraway. Namatay hiya ha ulser hadton Mayo 13.

Kilalado han mga kasama hi Ka Jaime komo Ka Mike, Ka Jordan ngan Ka Fred, nga waray kaparehas an dedikasyon ha Partido. Sakob han pira kadekada nagserbe hiya para ha rebolusyon ngan ha masa nga Pilipino. Kahuman magtikang komo batanon nga estudyante nga aktibista ha Cebu hadton dekada 1970, usa hiya ha mga maungod nga kumadto ha kabaryuhan, mabuhi upod an mga gintitiyupi nga parag-uma ha Leyte, ngan gintanom an liso han armado nga pakig-away kontra ha pasista nga diktadura nga Marcos.

Bisan kahuman han pagbagsak han rehimen tubtub ha iya kamatayon, padayon nga nagserbe ha rebolusyon hi Ka Jaime tungod kay nasabtan niya nga nagpapabilin an kakablasan ngan waray hustisya nga nagpukaw ha iya nga gumios. Diri nagin ulang an dirudekada han sarbeylans ngan pan-gigipit ha iya han pasista nga estado ha iya pagpatuman han rebolusyunaryo nga buruhaton.

Ginrerespeto nga komunista nga lider, kadre han Partido ngan Pula nga mangaraway hi Ka Jaime. Dako an nagin kontribusyon niya ha pagtukod, pagpahiluag ngan konsolidasyon han mga prente gerilya, ha pagtukod han Bagong Hukbong Bayan,

ngan ha pagpasulong han armado nga pakig-away ha isla han Leyte.

Ginkikilala liwat an iya mga nagin kontribusyon ha buruhaton propaganda. An iya hilarum nga kahibaruhan ha kamutangan han katawhan ngan mahinungdanon nga amot ha gerra han katawhan ha Leyte amo an mga hinungdan agud magin konsultant hiya para ha National Democratic Front ha Eastern Visayas ha pira kahugna han erestorya pankamurayawan ha Gubyerno han Republika han Pilipinas. Diri mahingangalimtan han Partido ngan katawhan Pilipino an iya serbisyo.

Bisan han magretiro hiya, nagpapabilin ha kabaryuhan hi Ka Jaime ngan bumulig ha Partido tubtub ha iya akos. Padayon hiya nga nagsagdon ha mga bag-o nga tisurunod nga mga rebolusyunaryo nga magpapadayon han rebolusyunaryo nga pakig-away nga iya ginpursige para ha katawhan Pilipino.

Ginpapasidunggan han Partido an kinabuhi ngan hinumduman ni Ka Jaime pinaagi han pagpapadayon han pakig-away para ha usa nga makatadungan nga murayaw nga katilingban. Para ha katawhan, an iya kamatayon sugad kadako hin Bukid Amandewin. Ginkakasubo nira an iya kamatayon kundi inspirado han iya susbaranan nga ipasulong an gerra han katawhan. **L**



"FMO...", "tikang ha paypay 3

Ginpahugot han mga sundalo an seguridad ha lugar para ha usa nga hirani nga proyekto nga ekoturismo nga gindedevelop ni Leyte 3rd District Representative Vicente "Ching" Veloso. Natahos tikang ha bungto han Matag-ob tubtub ha Merida an ginlalarang nga resort nga igititindog ha bag-o nga palit nga tuna ni Veloso.

Nagpatatuman gihapon an 802nd

IBde han kampanya nga surrender pinaagi han programa nga E-CLIP. Ha bungto han Carigara, iginbabandera han militar an tinagdamo nira nga napasurrender samtang maiha na ini nga sumurrender o diri ngani pira kabises na nga utro nga sumurrender.

Ha ikaduha nga distrito, ha mga bungto han San Isidro ngan Calubian, ginhahambog han 802nd IBde an 262

nga mga hadto anay nga rebelde nga dudrungan nga "sumurrender" hadton Pebrero. Ginlalawayan han mga upisyal sugad nira Gen. Dagoy an gintantantya nga P6,258,000 nga balor han "benepisyos" para ha mga sumurrender ilarum han E-CLIP. Tungod kay diri bug-os nga nakukuha han mga "benepisyaryo" an kwarta ngan ginkukura-kot la han higtaas nga upisyal militar. **L**